

四庫全書

集部

欽定四庫全書

集部

小畜集卷六

七

詳校官監察御史

臣李陽祇

檢討臣何思鈞覆勘

總校官進士

臣朱

鈐

校對官中書

臣田尹衡

銜

謄錄監生

臣陳

煜

欽定四庫全書

小畜集卷六

古詩

揚州寒食贈屯田張員外成均吳博士同年殿

省柳丞

揚州池亭即事

一品孫鄭昱

鳳皇陂

宋 王禹偁 撰

月波樓咏懷

卷六

十月二十日作

雷

秋霖

二首

真娘墓

遊虎丘

吳王墓

橄欖

為惡

揚州寒食贈屯田張員外成均吳博士同年殿省

柳丞

前年寒食節待詔直內廷休假百官出獨掩深嚴扃近
侍不敢醉賜酒空滿瓶閒就通中枕時聞索上鈴思入
亡何鄉兀然欲忘形去年寒食日滌上參專城山歌喧
里巷春物媚池亭永陽溪水綠琅邪山色青謫宦自消
遣不敢誇獨醒往往取官醞時時對花傾醉來念身世

翻使淚縱橫今年蒞淮海時節又清明對案有留事聽
歌無懽聲胥徒費簿領使客煩送迎狴牢未空歇堰決
勞修營衰病力不支懶慢性已成虛花滿雙目素髮添
幾莖酒穀畧無味妓樂固難聽誰言寒食下終日取茶
烹屯田布素交屈此闕市征昔年同應舉典衣飛巨觥博
士東觀客求官得步兵況且丹陛前同為出谷鶯殿丞
伊我邑桑梓復弟兄吏隱掌醪茗終朝談道經三賢宴
會少七夕休假并何不策我馬廢苑尋流螢何不蕩我

舟樓臺訪摘星三春景欲盡九曲渡始平居然逼吏役
頻此阻交情老態厭春華病身憂宿醒如水若不改藉
糟亦胡寧解印蓄素志吟詩露丹誠維揚非所愛有便
即歸耕

揚州池亭即事

冥心閱羣動亦各趨所安胡為名利人戚戚常鮮歡吾
生四十四結珮呼郡官掌言入綸閣待詔入金鑾非謂
得祿少所嗟持道難前年謫滁州憂時雙鬢殘賴有琅

邪溪時濯塵纓冠朝僉徒淮海任重力易殫君恩詎可
報感激涕沆瀾民瘼不能治惻隱情悲酸況復多病身
名官心已閒歸田未果決懷祿尚盤桓公退何所適池
亭一凭欄旭日媚春溪微風生鳴湍呵僮勿挾彈留客
不持竿用翼魚鳥馴熙熙肆遊觀神仙未可學吏隱聊
自寬孤吟刻幽石此義非考槃

一品孫鄭昱

卜葬得假告南出安上門鞭馬六十里暮投中書村一

翁館我宿茅屋欲黃昏有客忽投刺自稱一品孫氣貌

不凡俗因為開酒罇坐久問家諜其族大且繁池州有

清節濫觴發洪源

鄭美天寶末攜家遁於嵩少不受祿山偽命由是有清名大歷中自尚書

郎刺池州不赴任遂隱居嵩洛生五子綱最知名美累贈司空綱自撰父碑事迹甚詳太傅擅鴻

筆入相又出藩

綱元和中拜相又鎮嶺表終太子太傅致仕年七十八王起撰碑其家

本開封改號一何尊

綱為相時詔改宰相鄉鳳池里中書村

至是始六代

布衣老丘樊

綱生祇德祇德之子曰顯大中朝尚主顯弟項乾寧中太子太保項子嶠太子少詹

事嶠子與用一品孫補太廟齋郎顯德元年終泌陽令與子昱昱一品曾孫至綱六世矣跨驢入府

縣驅犢耕郊原家廟固已毀國史空具存盛德百世著
功必格乾坤高太已不祀羨綢何可論況復起章句乘
時寵便蕃子孫雖替陵尚得守田園我愛三代上法度
有深根卿大夫稱家世世奉蘋蘩四民有定分官路無
馳奔自從雜霸道傾奪日喧喧脫耒秉金鉞吮筆乘朱
軒朝榮暮又辱容易如掌翻古道不可復顏波益以渾
何況度木者倒置輪與轅我亦起白屋兩朝直紫垣蔭
子有官常賞延弟與昆盡得食人祿將何報君恩農桑

國之本孝義古所敦五族不力穡終歲飽且溫雖非享
富貴亦以蠹黎元唐賢尚消歇我輩奚足言呼兒諷此
詩播在麓與塤

鳳皇陂

次公治潁川仁政被一方神物不藏瑞茲焉集鳳皇在
昔奏簫韶舜庭來蹒蹒西伯有至化亦見鳴岐陽仲尼
豈無德已矣空悲傷夫何刀筆吏而能致休祥我來過
荒陂煙草但蒼蒼緬懷漢循吏史筆恐未詳

月波樓詠懷

有序

月波之名不知得于誰氏圖綴故老皆無聞焉因作古詩一章凡六百八十字陷于樓壁庶使茲樓之名與詩不泯也

郡城無大小雉堞皆有樓其間著名者不過十數州吹簫事遼曼仙跡費尋求庾公在九江締構何風流謝守鎮宣城疊嶂名有由東陽敞八詠吾聞沈隱侯白雪架郢中調高誰和酬黃鶴倚鄂渚仙去事悠悠贊皇謫滁

上作賦懷嵩丘樓居出俗態澤國多勝遊好景不遇人
安得名存留齊安古郡廢移此清江頭築城隨山勢屈
曲復環周茲樓最軒豁曠望西北陬武昌地如掌天末
入雙眸平遠無林木一望同離婁山形如八字會合勢
相勾

東晉方士戴洋言武昌有山無林山形八字勢不
及九故孫權以黃武元年都武昌八年遷建業

三國事既遠六朝名亦休近從唐末來爭奪互仇讎斯
樓備矢石此地控咽喉終朝望烽燧連歲事戈矛可憐
好詩景牢落無人收皇宋統萬國遠邇盡懷柔三聖四

十年蕩蕩文德修楚甸為內地黃岡壓上游儒冠假郡
印賤吏若公郵況多辦職吏誰肯恣吟謳伊余何為者
竊慕騷人儔兩朝掌文翰十年侍冕旒去歲出西掖謫
居抱窮愁日日江樓上風物得冥搜何人名月波此義
頗為優西南新桂魄初上懸玉鉤晚瀨清且淺漂蕩影
沈浮三五金波滿夜光如暗投驪龍弄頷珠晃朗照汀
洲澹臺披寶劍碎壁斬長虬冰輪曉入地推下赤金毬
闌干四五星斜漢印清秋誰家上九燈水玉工雕鏤此

景吟不出謾使聲呦呦千里畫圖闊四時詩興幽野花
媚宮纈芳草鋪碧油火雲照沙浦暴雨傾瓦溝白亂蘆
花散紅殷蓼穗稠簷冰垂若綆雪片大于鷗江籬煙漠
漠官柳雨颼颼舟子斜盪槳牧童倒騎牛水獺有時戲
江豚頗能汨山鳥奏竽籟落霞展衾裯魚網雪離離酒
旗風颼颼旅懷雖自適詩物奈相尤右顧徐邈洞精靈
知在不左看伍員廟僂僂令人羞樓中何所有官醞湛
蚍蜉碁枰留客坐琴調待僧抽桔苞鄰藥鼎詩筆間茶

既平生性幽寂寞誰獻酬官常已三黜懷抱罹百憂
凭欄憶王粲望闕同子牟自甘成潦倒無復事聲猷身
世喻泡幻衣冠如贅瘤放意亡何鄉誰分親與仇寓形
朝籍中毀譽任啁啾君恩無路報民瘼無術瘳唯慙戀
祿俸未去耕田疇題詩郡樓上含毫思夷猶功名非范
蠡何必泛扁舟

十月二十日作

是日甚寒
始有冰

重衾又重茵蓋覆衰懶身中夜忽涕泗無復及吾親須

史殘漏歇吏報國忌晨凌旦騎馬出溪冰薄潏潏路旁
饑凍者顏色頗悲辛飽煖我不覺羞見黃州民昔賢終
祿養往往歸隱淪誰教為妻子頭白走風塵修身與行
道多媿古時人

雷

商山春夏旱旱雷不降雨及秋又霖霖雷聲時一舉南
山復北山碣礚若臂虎君子容必變所以敬天怒無乃
豐隆鬼恣意擿雷鼓此怒既非天敬之亦奚取

秋霖 二首

秋霖週百日歲望終何如嘉穀就穗生茁茁垂青鬚宿
麥未入土大田多泥塗河闊不辨馬原高恐生魚時政
苟云失生民亦何辜雨若是天淚天眼應已枯

山雲百日雨山水十丈波田疇與道路一夕成江河巨
石大于瓮吹轉如蓬窠夏旱既損麥秋潦復無禾津梁
盡傾壞商販絕經過斗米二百金吾生將奈何安敢比
夷齊愚聖不同科應如元魯山餓死深山阿

元魯山山
居阻水絕

食而
死

真娘墓

女命在于色士命在于才無色無才者未死如塵灰虎
丘真娘墓止是空土堆香魂與膩骨銷散隨黃埃何事
千百年一名長在哉吳越多婦人死即藏山隈無色固
無名丘冢宜崔嵬唯此真娘墓客到情徘徊我是好名
士為爾傾一杯我非好色者後人無相咍

遊虎丘

樂天曾守郡酷愛虎丘山一年十二度五馬來松闌我
今方吏隱心在雲水間野性羣麋鹿忘機狎鷗鷺乘興
即到興盡復自還不知使君貴何似長官閒

吳王墓

惜哉吳王墓秦帝嘗開破應笑埋金玉千年賈餘禍不
待虎跡銷已聞鮑車過又是驪山頭炎炎三月火

橄欖

江東多果實橄欖稱珍奇北人將就酒食之先顰眉皮

核苦且澀歷口復棄遺良久有回味始覺甘如飴我今
何所喻喻彼忠臣辭直道逆君耳斥逐投天涯世亂思
其言噬臍焉能追寄語採詩者無輕擻攬詩

為惡

明時巧言士亂世佞倖郎佞倖唯苟且巧言頗包藏為
惡雖不同同歸于覆亡

小畜集卷六

欽定四庫全書

小畜集卷七

宋 王禹偁 撰

律詩

書懷

寄碭山主簿朱九齡

寄魚臺主簿傅翺

寄寧陵陳長官

寄金鄉張贊善

赴長洲縣作 二首

惠山寺留題

遊虎丘山寺

寄獻潤州趙舍人 二首

寄毘陵劉博士

謝柴侍御送鶴

官舍書懷呈羅思純

除夜寄羅評事同年 三首

陸羽泉茶

投柴殿院

東鄰竹

南園偶題

戲贈嘉興朱宰同年

春日官舍偶題

寄獻翰林宋舍人

吳江縣寺留題

獻轉運使雷諫議

二首

羅思純鶴斃為四韻弔之

即席送許製之曹南省兄

中元夜宿餘杭仙泉寺留題

贈草庵禪師

言懷

題響屨廊壁

中秋月

贈採訪使閤門穆舍人

泛吳淞江

獻轉運副使太常李博士

蘇州寒食日送人歸覲

春晚遊太和宮

再泛吳江

筍

三首

官舍書懷呈郡守

贈母中舍

贈贊寧大師

題錢塘縣羅江東手植海棠

武平寺留題

贈湖州張從事

送李中舍罷蕭山赴闕

寄主客安員外

和郡僚題李中舍公署

送奉常李丞赴闕

題張處士溪居

初拜拾遺遊瓊林苑

館中春直偶題

寄贊寧上人

歲暮偶書寄蘇臺舊僚友

朝退偶題

送王司諫赴淮南轉運

送郝校書從事相州

獻僕射相公

二首

賀李宗諤先輩除校書郎

送夏侯正言襄陽迎親

送鞠評事宰蘭溪

送查校書從事彭門

送史館趙寺丞出宰咸陽

送田舍人出守淮陽

送羅著作奉使湖湘

送夏侯正言奉使江南

送館中王正言使交趾

七夕應制

送柴郎中使高麗

送羅著作兩浙按獄

賀溫正言賜紫

送光祿王寺丞通判徐方

謝同年黃法曹送道服

送馮學士入蜀

賀將作孔監致仕

和陳州田舍人留別

五首

送密直溫學士西京遷葬

寄田舍人

送趙令公西京留守

送同年劉司諫通判西都

賀范舍人再入西掖

閣下詠懷

閣下暮春

舍人院竹

省中苦雨

二首

書懷

釋褐來成武初官且自強
位卑松在澗俸薄葉經霜
雨
茵生書案饑禽啄印床
猶驚寫秋卷槐砌落花黃

寄碭山主簿朱九齡

忽思蓬島會羣仙二百同年最少年
利市襴衫拋白紵風流名紙寫紅牋
歌樓夜宴停銀燭柳巷春泥污錦韉
今日折腰塵土裏共君追想好淒然

寄魚臺主簿傅翺

聽說魚臺景最奇鮑參軍到語多時

時林法掾來自魚臺因言煙水之興

故有此句

天晴綠野懸漁網木脫空城露酒旗
錦擲鮮鱗紅

撥刺雪翻寒鷺白襴衫仍誇縣尹風
騷客應有秋來唱

和詩

寄寧陵陳長官

吏隱寧陵縣琴堂枕古河
家山隔江遠風雨過船多
假日親尋藥公庭自種莎
相逢如舊識執手動勞歌

寄金鄉張贊善

年少辭榮自古稀
朝衣不著著斑衣
北堂侍膳侵星起
南畝催耕冒雨歸
種竹野塘春筍脆
採蘭幽澗露芽肥
伊予自是徒勞者
未得同遵舊釣磯

赴長洲縣作 二首

移任長洲縣登舟興有餘蓬蒿時見月棹穩不妨書雨
碧蘆枝亞霜紅蓼穗踈此行紆墨綬不是為鱸魚

移任長洲縣辭親淚滿衣折腰雖未免搔首欲何歸曉
白霜華重晴紅粟葉飛江頭鷗鷺在應怪不忘機

惠山寺留題

吟入惠山山下寺石泉間挹味何嘉好拋此日陶潛米
學煮當年陸羽茶猶負片心眠水石畧開塵眼識煙霞

勞生未了還東去孤棹寒篷宿浪花

遊虎丘山寺

寺牆圍著碧孱顏曾是當年海湧山盡把好峯藏院裏
不教幽景落人間劍池艸色終冬在石座苔花自古斑
珍重晉朝吾祖宅一迴來此便忘還

寄獻潤州趙舍人

二首

南徐城古樹蒼蒼衙府樓臺盡枕江甘露鐘聲清醉榻
海門山色滴吟窻直廬久負題紅葉出鎮何妨擁碧幢

聞說秋來自高尚道裝筇竹鶴成雙

記言采筆罷摘華郡閣高間似道家琴院坐聽江寺磬
郡樓吟見海山霞春園遺母親燒筍夜榻留僧自煮茶
應笑陶潛未歸去折腰奔走在泥沙

寄毘陵劉博士

毘陵古郡接江壖赴任琴書共一船下岸且尋甘露寺
到城先問惠山泉秋蟾吐檻供吟興野鶴偎床伴醉眠
官散道孤詩落筆老應雙鬢更皤然

謝柴侍御送鶴

兩朶春雲墮世間
霜臺乞與縣僚看
骨含仙氣生來瘦
羽插天風過處寒
唳別繡衣聲寂寂
舞隨藍綬意珊珊
今朝窻外頻相顧
應怪頭無獬豸冠

官舍書懷呈羅思純

同年事分幾般同
墨綬逶迤一郡中
仙桂並枝攀月魄
縣花反影笑春風
分莎種就尋僧逕
借竹編成養鶴籠
中暇不妨閒唱和
免教來往遞詩筒

除夜寄羅評事同年 三首

歲暮洞庭山知君思浩然年侵曉色盡人枕夜濤眠移
棹風搖浪開窻雪滿天無因一乘興同醉太湖船

除夜在天涯共君同憶歸夢中傾壽酒堂下著斑衣臘
雪通宵舞梅花到處飛更堪洞庭宿愁思倍依依

郡僚方賀正獨宿太湖稜堦下羞為吏船中祇載僧折
梅和薄雪煮茗對孤燈應笑排衙早寒靴踏曉冰

陸羽泉茶

梵石封苔百尺深
試茶餘味少知音
唯留半夜泉中月
嘗得先生一片心

投柴殿院

三十韻

南面修文德
東吳納土疆
蒼生思撫育
丹詔擇循良
烏府官新轉
龍頭桂舊香
渡江驄馬瘦
垂地繡衣長
綸閣材知屈
蘇臺俗必康
恩流一車雨
威凜栢臺霜
休假尋山寺
行春泊野塘
白公是前政
魯望有維桑
求瘼心雖切
願神道豈妨
煎茶虎丘井
搗藥木蘭堂
筍蕨供家饌

園林著道裝擊節教鶴舞收橘待僧嘗迎使朝衣穩娛
賓綺席張犬聲鎖巷陌鶯舌動笙簧冷句題秋葉孤琴
貯夜囊歌樓寒月白飲舫晚波涼官業除苛法家風襲

雅章

故兵部員外郎自牧之
子兵部以詩名擢第

豸冠危肅物象簡醉橫床

熊軾淹寧久鰲頭譽轉芳南園休命侶北闕即徵黃清
貴容誰見遭逢合自強字人叨屬邑畏德每循牆名品
知懸隔孤危俟荐揚折腰休太息青眼異尋常岱岳容
拳石滄溟納濫觴扶搖如借便羽翼必高翔從事員多

關徒勞跡可傷金臺雖載築珠履未成行始隗前言在
依劉後進光免教青史上獨美一燕王

東鄰竹

東鄰誰種竹偏稱長官心月上分清影風來惠好音低
枝疑見接筍筒似相尋多謝此君意墻頭誘我吟

南園偶題

天子優賢是有唐鑑湖恩賜賀知章他年我若功成去
乞取南園作醉鄉

戲贈嘉興朱宰同年

縣前蘇小舊荒墳，應作行雲入夢頻。
猶勝白公尉，盤屋

庭花剛喚作夫人。

朱未婚

春日官舍偶題

薄宦苦流離，壯年心已衰。
鶯花愁不覺，風雨病先知。
曉月晃竹屋，寒苔疊槿籬。
無人慰幽寂，庭柳自低垂。

寄獻翰林宋舍人

金鼎鹽梅偶未和，位高猶說野情多。
宮牆月上開琴匣，

道院風清響藥羅留客旋燒含露笋倩僧教種耐霜荷
孤寒知有為霖望未忍江頭釣綠波

吳江縣寺留題

松江江寺對峯巒檻外生池接野灘幽鷺靜翹青草碧
病僧閒說夜濤寒晨齋施筍惟溪叟國忌行香祇縣官
盡日門前照流水塵纓渾擬濯沆瀾

獻轉運使雷諫議

二首

富年辭氣壓朱雲老作皇家諫諍臣章疏罷封無事日

朝廷猶惜直言人題詩野館光泉石講易秋堂動鬼神
棘寺下僚叨末路齊心唯願秉陶鈞

江南江北接王畿漕運帆檣去似飛父子有才同富國
君臣無事免宵衣屏除姦吏魂應喪養活疲民肉漸肥
還有丈場受恩客望塵情抱倍依依

時諫議子有終
為淮南轉運

羅思純鶴斃為四韻弔之

雪乾朱澹殞仙姿千歲無徵事可悲埋瘞肯饒鸚鵡塚
飛鳴不到鳳皇池遺音尚在飄松逕舊跡猶存傍槿籬

應得羽人尸解術夜來何處啄靈芝

卽席送許製之曹南省兄

梅爛荷圓六月天歸帆高背虎丘煙到時自是成行雁
別處休聽滿樹蟬賣劍為賒吳市酒攜家猶借洞庭船
待看春榜來江外名占蓬萊第幾仙

中元夜宿餘杭仙泉寺留題

祭廟迴來畧問禪

時以歲旱山廟祈雨退宿于寺

鮮塙莎徑碧山前風

疏遠磬秋開講水響寒車夜救田藍綬有香花齒齒竹

卷七
憲無寐月嬋娟自慙政術貽枯旱忍卧松陰漱石泉

贈草庵禪師

陽山山下草庵深

陽山一名餘杭

寂寂香燈對遠岑莫怪相看

總無語坐禪為政一般心

言懷

宦途日日與心違人事紛紛任是非却為遊山置行李
漁家船舫道家衣

題響屨廊壁

廊壞空留響廡名為因西子遶廊行可憐伍相終朝諫
誰記當時曳履聲

中秋月

何處見清輝登樓正午時莫辭終夕看動是隔年期冷
濕流螢草光凝宿鶴枝不禁雞唱曉輕別下天池

贈採訪使閤門穆舍人

經畧十三州東南帝不憂二年辭玉砌幾夜夢珠旒旌
旆雖遐適江山是勝遊風謠隨處採民瘼盡心求報國

機鈴密供吟景象幽煮茶溪畔寺望月海邊樓步武思
龍尾琴書在鷁舟聽泉調玉軫拂石試銀鈎古畫多收
買新詩寡和酬酒醒聞瀑響睡起見潮頭奉使時將久
歸朝禮必優一麾先出守萬戶待封侯遇主當宜貴遺
材亦合收此身居下位無路畫良籌已悔田園廢堪驚
鬢髮秋憑誰念寒苦祇是擬歸休僻甚陶元亮貧過魯
仲由品題殊不濫清濁肯同流復命期三接陳詩說四
愁薦雄如有便還解殺身酬

穆好琴頗
善書札

泛吳淞江

葦蓬踈薄漏斜陽半日孤吟未過江
唯有鷺絲知我意
時時翹足對船窻

獻轉運副使太常李博士

邦計動宸衷時賢莅浙東
量寬吞渤海氣直稟崆峒

博士

燕人捧詔瑤墀下辭班
玉筍中饋糧蕭相國制禮叔孫通

舉措敦儒行詎諧有古風
冀方思舊政

博士前理冀人懷之

江

表佇成功吏畏嚴
霜白民歌愛日紅
勤王雖運智修道

豈妨公旋種煙莎逕間科雨竹叢養成丹頂鶴瘦盡雪
花驄移石情無倦抄書俸不充晨餐燒露筍秋句寫霜
楓碁閣連花塢書窓映燭籠僧傳栽樹法客獻遞詩筒
飲席螺為盞吟舟葦作篷按琴苔院冷搥藥月堂空清
白成家計操修達聖聰即徵歸象闕清秩冠鴛鴻

蘇州寒食日送人歸觀

江城寒食下花木慘離魂幾宿投山寺孤帆過海門蓬
聲潑火雨柳色禁煙村定省高堂後斑衣減淚痕

春晚遊太和宮

數里新萍夾岸莎春來永興宿煙蘿隨風蝴蝶顛狂甚
當路花枝採折多絳節參差抽苦筍翠鈿狼籍撒圓荷
湖山滿眼不休去空羨漁翁雨一蓑

再泛吳江

二年為吏住江濱重到江頭照病身滿眼碧波輸野鳥
一蓑疎雨屬漁人墮船曉月孤輪白入座晴山數點春
張翰精靈還笑我綠袍依舊惹埃塵

筍 三首

數里春蹊獨自尋
迸瓊抽錦亂森森
田文死去賓朋散
拋擲三千玳瑁簪

綠玉修修冷罩煙
一溪春露洗嬋娟
不知徐福歸何處
卅女童男泣海田

一夜春雷起舊根
亂披煙籜出溪門
稚川龍過頻回首
認得青青數代孫

官舍書懷呈郡守

年來潘令髻初凋，瘦馬青衫恥下僚。
藥債漸多醫宿疾，官情猶切戀明朝。
空江梅雨添幽鬱，古縣槐花鏤寂寥。
賴有郡侯知已在，每憐憔悴賃金貂。

贈母中舍

嶺表榆關路嶮巖，頒條持節兩無辭。
四方自是男兒事，萬里歸來聖主知。

中舍嘗奉使入蕃又連青牧嶺外二郡由是知名

雪嶺舊行

閒入夢貪泉，曾飲別留詩。
如今已見功名立，休憶當年一桂枝。

贈贊寧大師

詔修僧史越江濱萬卷書中老一身赴闕尚留支遁馬
援毫應待仲尼麟溟濛雪影松窗曉狼籍苔花竹院春
還許幽齋暫相訪却慙陶令滿衣塵

題錢塘縣羅江東手植海棠

江東遺跡在錢塘手植庭花滿院香若使當年居顯位
海棠今日是甘棠

武平寺留題

縣齋東面是禪齋公退何妨引鶴來
長愛座中如洞府却慙衣上有塵埃
竹聲冷撼秋窻雨山影青籠晚院苔
最憶去年飛雪裏煮茶煨栗夜深迴

贈湖州張從事

前年春榜亞龍頭詞賦曾推第一流
上直未歸紅藥院供吟先得白蘋洲
酒醒野寺烹山蕨公退溪亭狎海鷗
自是吳門折腰吏滿衣塵土為君羞

送李中舍罷蕭山赴闕

吏隱江東五六年歸朝猶戀好山川
野僧送別攜詩句瘦馬臨歧當酒錢
吳苑醉逢梅弄雪隋堤吟見柳垂煙
自言更共秋濤約未舍西央一釣船

寄主客安員外

十韻

罷郡歸蘭省還愁到帝鄉
趨朝騎瘦馬賃宅住閒坊
命服紆春草吟髭撚夜霜
有心憶雲水無語押班行
藥債經年欠文編滿篋藏
教兒學辭賦倩客賣囊裝
尋寺誰同步留僧自拂床
舉公投卷軸時相覓文章
窮達君雖

了沉淪我亦傷何當昇大用吾道始輝光

和郡僚題李中舍公署

樹影池光映曉霞綠楊陰下吏排衙閒施屐齒妨橫筍
靜拂琴床有落花地脈暗分吳苑水廚煙時煮洞庭茶
青宮詞客多閒暇按曲飛觴待歲華

送奉常李丞赴闕

江城方話舊捧詔去長安宦路相逢少鄉情敘別難煙
波迷曉渡風雨動春寒初夏應回首重期看牡丹

題張處士溪居

雲裏寒溪竹裏橋，野人居處絕煙囂。
病來芳草生漁艇，睡起殘花落酒瓢。
閒把道書尋曉暎，靜攜茶鼎洗春潮。
長洲懶吏頻過此，為愛盤飧有藥苗。

初拜拾遺遊瓊林苑

開宴曾遊此，綴行五年為吏別。
仙鄉杏園鶯蝶如相識，應怪重來舊綬香。

館中春直偶題

御柳差差拂禁牆
菲才何事直仙鄉
坐聞雞唱自宮近
睡枕魚鬚白日長
簾掛蘚庭微雨霽
硯添桐井落花香
春風老盡詩情淡
翻卷青編獨遠廊

寄贊寧上人

時上人進新修高僧傳有詔赴闕

支公兼有董狐才
史傳修成乙夜開
天子遠酬丹詔去
高僧不出白雲來
眉毛久別應垂雪
心印休傳本似灰
若念重瞳欲相見
未妨西上一浮杯

歲暮偶書寄蘇臺舊僚友

吳門吏隱過三年何事陶潛捧詔還步武已趨龍尾道
夢魂猶憶虎丘山花開茂苑誰同醉雪滿梁園獨掩關
會待他年求郡印劍池重遶碧潺潺

朝退偶題

吏隱金門祇似閒退朝窮巷懶開關經年不到公卿宅
五日空隨侍從班禁漏出花寒歷歷御泉通市細潺潺
功名未立年猶少爭忍攜琴去舊山

送王司諫赴淮南轉運

白獸樽前侍玉除暫分邦計別宸居映淮風月供吟筆
拱極星辰伴使車別宴酒濃桑葉落野亭霜薄菊花疎
東南莫作三年調紅藥香繁在直廬

送郝校書從事相州

提筆從戎別帝鄉宦情兼領校書郎將軍幕下紅蓮媚
詩客袖中丹桂香吟倚旌旗春過雨醉聽刁斗夜含霜
金臺莫作多時計非久應歸振鷺行

獻僕射相公

二首

罷調金鼎道光輝聞說閒園自種薇書院日斜春睡覺
沙堤人靜早朝歸吟依竹逕僧同步醉遶花庭蝶上衣
却恐優游未終歲台星依舊照黃扉

五年黃閣掌陶甄憂國翻成兩髻斑初引廟堂溫樹冷
暫收霖雨岳雲閒春園領鶴尋芳草小閣留僧畫遠山
惟有門生苦求見竹齋花院一開關

賀李宗諤先輩除校書郎

秘省官清住帝鄉春風原是狀元郎未吟紅藥歸西掖

且著青衫侍北堂射策更期揮健筆騎驢猶得醉閒坊
同年佐邑應相羨衣上芸香雜桂香

送夏侯正言襄陽迎親

蘭省方讐乙夜書襄陽迎侍斃脂車揮毫偶未歸綸閣
衣錦何妨奉板輿岷首碑前留馬足鹿門山下宿僧居
漢臯游女曾相識應解鳴璫換佩魚

送鞠評事宰蘭溪

東下蘭溪數十程幾多山水入圖經科名舊捷仙人桂

縣界遙看婺女星
琴院靜籠江樹綠
勅樓高對海峯青
三年吏隱無嗟嘆
百里封疆似畫屏

送查校書從事彭門

佐幕徐方鬢未秋
官升芸閣更風流
姓名舊在鶯遷勝
詩什重題鶯子樓
漸有俸錢供藥債
應無歸夢到漁舟
公餘時上臺頭寺
珠履金貂共勝遊

曹侍中
為徐帥

送史館趙寺丞出宰咸陽

縣連秦漢舊離宮
分付詩人勝武功
帶職遠辭書殿去

攜家深入畫圖中
庭花曉潤終南雨
檻竹寒搖渭水風
百里封疆三館客
折腰休嘆似陶公

送田舍人出守淮陽

藥樹吟多且握蘭
藹然公譽滿朝端
西垣罷直蒼苔冷
南郡行春綠野寬
蒨旆出過應璩墓
棠陰潛上伏犧壇
鄉心休夢峨眉雪
會顧青蒲憶史丹

送羅著作奉使湖湘

使星躔次入長沙
曉別延英去路賒
數刻漏中承密旨

幾重湖外奏皇華
山行馬拂湘川石
寺宿僧供岳麓茶
迴日期君直西掖
當時紅藥正開花

送夏侯正言奉使江南

百舌關關溪隴青
遠山迎馬翠如屏
禁中已誦相如賦
江外猶看使者星
衣拂茶煙尋水寺
枕敲梅雨泊沙汀
歸期莫過中秋節
侍宴甘泉月滿庭

送館中王正言使交趾

乘輶南下興何長
大半江山是故鄉
蠻府好迎天上使

朝賢不為橐中裝犀牛出水挨銅柱颺母扶空卸海檣
復命丹墀莫經歲北門西掖待翱翔

七夕應制

斜漢橫空瑞氣浮橋邊烏鵲待牽牛長生殿冷時無事
乞巧樓多歲有秋菡萏晚花清露濕嬋娟新月暮煙收
華封禱祝華胥夢誰道神仙不可求

送柴郎中使高麗

初過清明野色繁柳花榆莢撲軺軒中台應宿郎官貴

外國占星使者尊海水無波分島嶼扶桑見日認藩垣
東夷休請蕭夫子好把詩書問狀元

送羅著作兩浙按獄

著作嘗宰
蘇州吳縣

使印星車適舊遊陶潛今日在瀛洲科條盡曉三千罪
圉圉應空十二州舊綬有香籠驛馬皇華無暇狎沙鷗
歸來重過姑蘇郡莫忘題名向虎丘

賀溫正言賜紫

密疏封來乙夜看延英召對議安邊紫頌紫綬同三品

舊賜朱衣未一年白獸捧樽斟御酒金魚垂鬣惹爐煙
從今便有公卿望休夢天台瀑布泉

送光祿王寺丞通判徐方

通倅徐方舊綬新老萊衣服暫離身家君蓮幕開廳事

少儀丈人頃年載筆徐方訪問今通判
廳即翩翩解宇也父子維處士人榮之府帥金貂耀縉

紳戲馬臺荒春寂寞斬蛇鄉古樹輪囷公餘應長吟滋
味好寄西垣寓直人

謝同年黃法曹送道服

鮑昭貽我羽人衣下直何妨盡日披老去自堪將野鶴

客來休更佩金龜官供謾說青綾被

漢尚書郎更直建禮門給青綾被今

西垣之任

私便全勝白接羅未脫朝簪戀明主耿懷空作謝

君詩

送馮學士入蜀

錦川宜共少年期四十風情去未遲蠶市夜歌歌枕處
峨嵋春雪倚樓時休誇上苑吟紅藥多羨乘輶聽子規
莫學當初杜工部因循不賦海棠詩

賀將作孔監致仕

泣辭明主挂冠簪便約幽雲老舊林朝請罷來頻典笏
田園歸去只攜琴焚香靜院當山色曉藥空庭避竹陰
一子得官三品祿未饒疏傳有黃金

和陳州田舍人留別

五首

宛丘分理藉賢明暫輟詞臣撫百城職罷掖垣人共惜
郡連京輔自為榮休吟紅藥堦前色且聽長淮枕上聲
駐馬都門相別處柳黃沙碧上林鶯

東風初暖酒難銷五馬行春罷趁朝道畔棠陰同召伯
堦前萱莢別唐堯下車正是嘗新筍得句何妨寄舊僚
預想郡齋公宴處桃花凝露柳垂條

演綸多暇每封章暫去頒條道更光郡吏好排紅粉妓
使君曾是紫微郎樓臺有月新詩出園囿無人綠草長
地接清淮足佳致水村煙塢似吳鄉

淮陽冰綻柳條新風物暄妍土俗淳捧詔暫辭雙闕路
勸農深入四郊春茶煙靜拂聽琴鶴穀雨輕籠鋤麥人

贏得褰帷恣吟興落花飛絮滿車茵

頌條京輔近吾君政術高於召信臣道服日斜披鶴氅
藥畦春暖步龍鱗歸朝莫惜三年調化俗應蘇一郡人
願作淮陽去思頌與君刻石慰陳民

送密直溫學士西京遷葬

錦衣西去道何光卜葬伊川舊釣鄉留守開筵親舉白
故人垂淚看焚黃重尋泉石應多感旋插松楸未著行
一月歸程如有暇雲間時到讀書房

寄田舍人

出處昇沈不足悲，羨君操履是男兒。
左遷郡印辭綸閣，直諫書囊在瑣帷。
未有僉諧徵賈誼，可無章疏雪微之。
朝行孤立知音少，閒步蒼苔一淚垂。

送趙令公西京留守

勲業與誰同，蕭何第一功。
兩朝行直道，萬國變淳風。
微恙妨三接，辭榮動四聰。
白麻宣上閣，清洛守離宮。
讓表回宸翰，朝辭泣舜瞳。
對深移五刻，官重帶三公。
鳳浴荀

池暖龍蟠洛邑雄位尊非借寇神爽近維嵩導騎香塵
細肩輿曉霧籠下車鷄鳴語開宴牡丹紅溫樹深嚴夢
甘棠蔽芾叢趨庭採蘭子投刺茹芝翁廣化如靈鷲天
津似綵虹先皇陵樹老白傅影堂空春饌思山蕨秋屏
盡水蕙御泉達廳解禁柳映簾櫳元老優游盛明君眷
注隆更須歸相府特地代天工永佐千年運重頒九錫
弓不同崔四人正在亂離中

送同年劉司諫通判西都

元老留司卧，雒陽諫官通。理輟駕行仲宣舊，佐紅蓮幕。
裴度新開綠野堂，幾處古碑停馬讀。到時春筍約僧嘗，
香山居士真容在。為我公餘奠一觴。

賀范舍人再入西掖

再入承明舊直廬，腰間仍得佩金魚。

舍人前在綸閣元是朱紱

重批

漢武求賢詔，曾上東方自薦書。

舍人早歲自諫垣上書自此東方朔遂入閣下

紅藥篇章應感動，紫泥封檢未生疎。樊川杜曲休勞夢，

日日延英侍玉除。

舍人前自綸閣出知永興故有樊川杜曲之句

閣下詠懷

正向承明戀直廬年來華髮已侵梳

予年三十八始見白髮

官清

自比乘軒鶴心小還同畏網魚西掖永懷王閣老

故兵部王

侍郎出入西掖三十餘年

北門堪嘆扈尚書

故承旨扈公在兩制

屬纊之際方有貳卿之命

三十年不能引退以至老病不任宿直始有正卿之命

會當辭祿東陵去數畝

田一柄鋤

閣下暮春

詔書稀少日何長閒枕通中睡一場院吏報來丞相出

紫微花影上東廊

舍人院竹

封了詞頭遶砌行
此君相伴最多情
西垣不宿還堪恨
辜負夜窻風雨聲


省中苦雨

二首

霏霏連晝復連宵
紅藥蒼苔也寂寥
唯有御溝堤畔柳
拂簷遮檻不勝嬌

醉魂吟魄正悽悽
簷溜窻風冷切肌
階下愁蛙休跳躍

浮雲遮日不多時



小畜集卷七

欽定四庫全書

集部

小畜集卷八

詳校官監察御史_臣李陽樾

檢討_臣何思鈞覆勘

總校官進士_臣朱鈐

校對官中書_臣田尹衡

謄錄監生_臣陳煜

欽定四庫全書

小畜集卷八

宋 王禹偁 撰

律詩

初出京過瓊林苑

已下謫商於作

中年縣旅舍喜同年高紳著作見訪

鄭州與張秉監察聯句

滎陽懷古

過鴻溝

旅次新安

硤石縣旅舍

稠桑坡車覆

聞鄉旅夜

初入山聞提壺鳥

聽泉

初到商州館于妙高禪院佛屋壁上見草聖數
行讀之乃數年前應制所作皇帝試貢士詩

追思前事感而成章

謫居感事

敝帷詩

和馮中允仙娥峯

龍鳳茶

元日作

急就章

御書錢

上元夜作

仙娥峯

遊仙娥峯後戲題

上寺留題

對雪感懷呈翟使君馮中允同年

遊四皓廟

商山

丹水

歲暮感懷貽馮同年中允

三首

畚田詞

五首

雪後登靈果寺閣

獨遊南靜川

賀畢翰林

賀三舍人新入西掖

呂祐之 錢若水
王旦

送舍弟赴舉因寄兩制諸大僚

商山海棠

翰林畢學士寄示醫癭藥方因題四韻兼簡兩
制諸知

內翰畢學士子安外制柴舍人成務故兵部閣

老王公祐之門生又與第五廳舍人旦同在
兩制追思餘慶因賦短章寄于三君子

賀柴舍人新入西掖

歲除日同年馮中允攜觴見訪因而沈醉病酒
三日醒而偶贈

得昭文李學士書報以二絕

來書云看書除莊
老樂天詩最宜枕

藉

南靜川野桃花下獨酌因簡馮中允

放言

寄獻僕射相公

二首

寄馮舍人

起

迴襄陽周奉禮同年因題紙尾

清明日獨酌

寒食

春日登樓

山僧雨中送牡丹

春居雜興

二首

登郡南樓望山感而有作

讀史記列傳

睡

送秦供奉自商州使鄂渚

聞進士孫何及第因寄

哭同年羅著作

三首

西暉亭

謫居

道服

寄題洛南秦供奉新樓

獨酌自吟拙詩次吏報轉運使到郡戲而有作

春遊南靜川

初出京過瓊林苑

已下請商於作

忽憶今春暮宮花照苑牆瓊林侍游宴金口獨褒揚立

向勾陳上宣來帝坐傍丁寧問年紀委曲敘行藏屏息

聞天語醜顏醉御觴近臣多健羨霄眷豈尋常

已上並敘淳化

二年三月
中實事

盛事誰能及非才自不遑殊恩難負荷薄命

果詩張得罪縻山郡攜家出暗鄉何時重到此駐馬淚

浪浪

中年縣旅舍喜同年高紳著作見訪

是時紳將命
集津命權不

期而會
陝郊

古縣日初沉
輶車忽見尋
不將遷客累
方認故人心
無酒銷寒漏
挑燈聽遠砧
陝郊千里路
並轡未妨吟

鄭州與張秉監察聯句

時秉知州來訪逆旅與紳同飲因成一絕高作小序

不載
于此

函關秋霽雁初迴
六里商於曉色開
秉四皓有靈應笑

我謫官方始入山來

禹偁

滎陽懷古

紀信生降為沛公草荒孤壘想英風漢家青史緣何事
却道蕭何第一功

過鴻溝

侯公緩頰太公歸項籍何曾會戰機只見鴻溝分兩界
不知垓下有重圍危橋帶雨無人過敗葉隨風傍馬飛
半日垂鞭念前事露沙霜樹映斜暉

旅次新安

遷客乍離羣秋砧不忍聞回頭戀紅藥失脚下青雲尚

假金貂冕猶殘柱國勲此身未敢死曾擬報明君

硤石縣旅舍

霜乾紅葉飛遷客思淒淒處險人垂瘵登山馬阻蹄籬
荒蜚韻苦雲凍雁行低此夕應無寐何煩報曉雞

稠桑坡車覆

稠桑坡險忽摧車悔戴儒冠出敝廬已被文章相錯誤
謫官猶載一車書

閬鄉旅夜

行盡兩京路將登六里山全家空洒淚知是幾時還

初入山聞提壺鳥

時秋暖此鳥忽聞

遷客由來長合醉不煩幽鳥道提壺商州未是無人境
一路山村有酒沽

聽泉

平生詩句多山水謫宦誰知是勝遊南下閬鄉三百里
泉聲相送到商州

初到商州館于妙高禪院佛屋壁上見草聖數行

讀之乃數年前應制所作皇帝試貢士詩追
思前事感而成章

應制詞篇對玉除是誰傳寫到商於昔從蓂莢堦前作
今向蓮花座畔書商嶺未甘隨綺季漢廷曾忝用相如
山僧莫怪頻垂淚乍別承明舊直廬

謫居感事

一百六十韻

遷謫獨熙熙襟懷自坦夷孤寒明主信清直上天知消
息還依道生涯只在詩何當諭山木詎敢詠江離偶嘆

勞生事因思志學時讀書方觀奧下筆便搜奇賦格欺
鸚鵡儒冠薄鷄鵲耕桑都不事園井未曾窺但欲縑緗
富寧教杼軸紕光陰常矻矻交友盡惻惻步驟依班馬
根源法孔姬收螢秋不倦刻鵠夜忘疲流輩多相許時
賢亦見推叨榮偕計吏濫吹謁春司僕瘦途中病驢寒
雪裏騎空拳入場屋拭目看京師技癢初調箭鋒鋌欲
試錐甲科登漢制

太平興國五年
予首中甲科

內殿識堯眉數刻愁

哺矣三題亦勉之先鳴翰俊彥上第遂參差罷舉身何

託還家命自奇唯慙親倚戶敢望嫂停炊竭力求甘旨
終朝走路岐貪希仲由米多廢董生帷丹桂何時折孤
蓬逐吹移知憐無國士志氣自男兒季子貂裘敝狂生
刺字墮廣場重考覆蹇步載驅馳明代寧甘退青雲暗
有期禮闈冠多士

八年予忝
春官貢薦

御試拜丹墀澤霧寧慙豹

搏風肯伏雌重瞳念孤跡一第忝鴻私得告還鄉貴除

官佐邑卑折腰稱小吏矩步慎初資

予解褐
得主簿

枳棘心何

恨松筠操自持及親家有養事長禮無虧銅墨官常正

烟霄雨露垂縣花聊主管寺棘且羈縻

予九年忝授大理評事知蘇州

長洲縣

吳郡包山側長洲巨海湄萬家呼父母

民家多呼縣令為父

母官

百里撫惇戢敢起徒勞嘆長憂竊祿嗤官途甘碌碌

官業亦孜孜政事還多暇優游甚不羈村尋魯望宅寺

認館娃基

甫里有陸魯望宅靈岩寺館娃故宮

西子留香逕吳王有劔池

採香徑在靈岩寺劔池在虎丘寺

狂歌殊不厭酒興最相宜草織登山

屐蒲絢

平

晚舫維果酸嘗橄欖花好插薔薇震澤柑包

火松江鱸縷絲三年無異政一篋有新詞多戀南園卧

蘇州南園
最為勝景

俄從北闕追

雍熙四年予奉徵召赴闕

呈材真樸檄召對

立茅茨載筆居三館登朝忝拾遺紫泥天上降朱紱御

前披侍從殊為貴圖書頗自怡史才媿班固諫筆謝辛

毗擬把微軀殺慙將厚祿尸安邊上章疏

端拱三年詔百官各言邊

事因上封章極言為上容納

端拱獻箴規

予初拜拾遺即上端拱箴頗有諷諭

精鑒逢

英主知憐是首夔

予論邊事時為趙許公所器

賡歌才不稱掌誥筆

難搞

是歲蒙上召予殿上作歌遂有西掖之拜

制歷多無事

闕下有制歷當直舍人如無除

目署名

詞頭每怯遲繁陰溫室樹清吹萬年枝青瑣霞

光透蒼苔露片萎御香飄硯席宮葉落纓綈看浴池心

鳳間捫殿角螭上林花掩映仙掌露淋漓對近瞻旒冕

班清辟虎貌宮簾垂翡翠御水動漣漪紀號年淳化朝

元日建寅

音移

攝官捧寶冊

淳化元年正月日上尊號予攝中書侍郎捧玉冊玉寶

祝壽執樽爨表案行低折

時予又侍諸方表案

宮懸聽肅祇德音

王澤潤

是日德音降

謙柄斗杓撝

時上省尊號

貴接臯夔侶深窺

龍鳳姿策勲何烜赫賜紫更萎蕤

是歲加柱國謝日而賜金紫

奮力

山難負鵜梁翼易滋論功慙八柱受服欲三褫祗恐殃

將至曾無事可裨趣朝空俯偃退食自逴迤更直當春

好橫行隔宿浴

每休假三日後謂之橫行正街于叅假院吏隔夜報

內朝長得對

駕幸每教隨瓊苑觀雲稼金明閣水嬉賞花臨鳳沼侍

釣立魚抵拂面黃金柳酖顏白玉卮分題宣險韻

每應制賦

詩上出險韻

翻勢得仙棊

上嘗賜兩制棊勢目一曰對面千里二曰獨飛天鵝三曰海底取明

珠四曰妙算無窮人莫曉

竟舉窺天管爭然煮豆其恨無才應副空

有表虔祈

每有御製詩韻難并新棊勢但上表免和所不曉而已

睿睠偏稱賞天

顏極撫綏中官賜文字

兩制每賜御詩皆中官送至書院

院吏捧巾棊

遭遇誠堪惜功名竊自思請纓無壯志視草亦胡為未

獻東封頌空鐫北岳碑

淳化元年奉勅重修北岳予撰碑

深慙專俎豆

長欲議邊陲但可懷驕子何須斬谷蠡胃中貯兵甲塞

上有熊羆成敗觀千古施張在四維兼磨斷佞劍擬樹

直言旗

已上益言予平生之志也

遇事難緘嘿平居疾喔咻無權逐

鳥雀俛首任狐狸廷尉專刑煞

予以舍人兼大理評事

詞臣益寵

衰五花儀久廢

故事舍人五花判事今則廢之久遠矣

三尺法聊施書命

猶無諂

予在閣下草詞名不虛飾以此亦為人相怨

評刑肯有欺厚誣凌近

侍內亂疾妖尼

妖尼道安誣告徐騎省

丹筆當無赦金科了不疑

拜章期悟主引法更防誰
萋斐終無已雷霆遂赫斯
如弦傷訐直投杼覓瑕疵
衆鑠金須化羣排柱不支
佞權迴北斗讒舌簸南箕
闕下羊腸險朝端虎尾危
道狐貽衆怒責薄賴宸慈
西掖除三字南山佐一麾
蒼黃塵滿面揮洒涕交頤
目斷九重闕魂銷八達逵
尊親遠扶持兄弟盡流離
秦嶺偏巉絕商於更嶮巖
吾廬何處是我馬忽長辭
六里山蒼翠丹河浪渺瀰
分封思衛鞅割地

憶張儀懶讀三閭傳空尋四皓祠檜煙濃似瘴松雪白
如梨壞舍床鋪月寒窻硯結澌振書衫作拂解帶竹為
鵲呼僕泥茶竈從僧借藥篩鐘愁上寺起角怨水門吹

上寺在州北
子城有水門

舊友誰青眼新秋出白髭

予到商州
始有白髭

煙嵐

晴鬱鬱風雨夜颼颼我過徒三省吾生自百罹初來聞
旅鴈不覺見黃鸝市井攜山菜房廊蓋木皮

商州民多
以木皮蓋

屋
野花紅爛漫山草碧襜褕副使官資冷商州酒味醺
尾因求食掉角為觸藩羸有夢思紅藥無心採紫芝瘦

妻容慘戚稚子淚漣漣暖怯蛇穿壁昏憂虎入籬松根
然夜燭山蕨助朝饑豈獨堂虧養還憂地乏醫跡飄
萍渤澥親老日崦嵫閣下辭巢鳳山中伴野麋風欺秀
林木雲隔向陽葵屈產遭驚馬丹山困嚇鴟悔須分黑
白本合混妍媸自此韜餘刃終當學鈍鋌窮通皆有數
得喪又奚悲自顧才何者空憐道在茲宣尼猶削伐大
禹亦胼胝用去當如虎投來且禦魑避風聊戢翼得水
會揚鬚琴酒圖三樂詩章効四雖

白公有
四雖詩

魚鬚從典賣

貂尾任傾欹
冗冗拖腸鼠
悠悠曳尾龜
北窻尋蛺蝶
南

岸看鷓鴣

州之南河洲多水鳥

山翠樓頻上
雲生杖獨攜
簾間留

曉魄簷暖負冬曦
松柏寒仍翠
瓊瑤溜不溜
望誰分曲

直祇自仰神祇
吾道寧窮矣
斯丈未已而狂吟
何所益
孤憤洩黃陂

敝帷詩

到商州數日馬死

謫宦那堪歎
敝帷承明寓
直數年騎滿堦
紅藥曾嘶處
六里青山忽斃時
駿骨欲埋金價直
的盧猶愛雪離披

載車謾道貂冠貴從此徒行奉一麾

和馮中允仙娥峯

熊耳如當出檻容仙姿孤秀壓諸峯採芝逋客憐貞質
化石佳人妒麗容身上霓衣慵整頓天邊華蓋會裁縫
嫦娥月裏休相笑萬古應無竊藥蹤

龍鳳茶

樣標龍鳳號題新賜得還因作近臣烹處豈期商嶺水
碾時空想建溪春香於九畹芳蘭氣圓似三秋皓月輪

愛惜不嘗唯恐盡除將供養白頭親

元日作

獻歲在商州依然想舊遊前年捧玉冊此日對珠旒御
酒堯樽畔仙韶舜殿頭自慙非賈傅宣室詎重求

急就章

賜來三載錦囊盛今日重看倍覺榮元白當時皆謫官
不聞將得御書行

御書錢

謫官無俸突無煙惟擁琴書盡日眠還有一般勝趙壹
囊中猶貯御書錢

上元夜作

去年正月十五夜乾元門上奉乘輿今年正月十五夜
商於郡中為貳車謫官門欄偏冷落山城燈火苦蕭疎
爐灰撥盡不成寐賴有逍遙一帙書

仙娥峯

竊窺奇峯疊古苔望秦嶺外勢徘徊巨靈非擘休期刻

毛女為鄰合往來傳粉微茫春雪在墮環浮動曉雲開
好邀上雉五常侍時就巖前飲一杯

遊仙娥峯後戲題

為愛一峯形窈窕豈辭十里路崎嶇誰知不似陽臺女
別後經宵夢也無

上寺留題

在商州
北山上

松杉影瘦簇山根樓殿參差對郭門不惜馬蹄來北寺
為憐熊耳在西軒雲生石砌搖寒影泉汲銅鉞露冷痕

遷客頻來何所得一叢修竹拂吟魂

對雪感懷呈翟使君馮中允同年

歲暮山城雪民和歲有秋深慙五袴詠聊減貳車愁凌
亂藏溪寺霏微洒郡樓凍宜粘酒旆香好試茶甌逐吹
殊無定連宵勢未休仙娥低粉面仙娥峯在商州西熊耳壓峯

頭熊耳山亦在州之西

樹老花重發川長縞不收平沉採芝洞深

鑊避賢郵

陽城驛在商州元稹詩中改為避賢郵

麋鹿全迷逕鷹鷂不下

韝夜村埋古屋

夜村在州東一村數百家皆姓夜羅隱有夜村詩

丹水咽寒流

上洛城中客梁園日下州前年直綸閣臘月奉宸遊六
出寒光亂重瞳喜氣浮催班臨秘殿稱賀拱凝旒漠漠
籠天仗輕輕落御溝瑤池同皎潔珠箔助颼颼民有豐
年望君無盱食憂佩垂延喜玉服曜吉光裘雞樹令開
宴駕行許命儔千鍾方灑灑三爵未油油舉白朱顏凝
飛文彩筆抽傳宣須盡醉御札遣冥搜晚出蒼龍闕驕
馳紫驚駟自慙生草澤人指在蓬丘薄命誠非據清途
不久留左遷來僻郡對景憶瀛洲謫宦誰還往貧家自

獻酬敢言無俸祿且喜潤田疇鳳閣名雖黜貂冠命亦
優山中甘散秩膝下奉晨羞默默惟思過陶陶亦自由
搖頭詠詩什合眼入衾裯祇恨方於枘何嘗曲似鉤詎
能悲鵬鳥早合畏犧牛玉冷期三蕤蘭香任一蕝夢中
非蛺蝶世上本蜉蝣禍福如亡馬機關喻狎鷗甘貧慕
原憲齊物學莊周尚賴遷鶯侶旁依建隼侯願隨商洛
叟擊壤頌皇猷

遊四皓廟

修篁瑟瑟石磷磷去謁荒祠不厭頻四皓古來無事客
貳車今世最閒人紫芝欲採非仙客紅藥曾題是近臣
一奠村醪還獨酌滿軒松雪照吟身

商山

十二
韻

六百里巉巖嵐光霽後添經年吟未得

予到商州已經
年方有此詩

盡日看無厭僧舍青當檻人家翠滿簷氣蒸丹水碧

丹水

在商山
入漢

脈潤紫芝甜嶺礙翻雲鵲

商山鵲
嶺最高

峯遮落海蟾

澗深春有凍影闊夏無炎勢鬪嵩并華名欺霍與滿石

危蹲虎脚松老吃龍髯曉榻便欹枕晴樓懶下簾未能
棲岫幌猶道佐彤檐望久衣襟濕登多屐齒黏何當隨
四皓深隱避猜嫌

丹水

十二韻

瑟瑟復潺潺朝宗去不還和雲歸漢浦歆雪下商山影

浸仙娥面波涵織女鬟

仙娥峯織女峯在丹水邊

飲猿清滿掬渡鹿

冷侵斑北闕深通洛

洛原在丹水之中

東奔嶮叩闕

武關

灌園紫

似帶漕磴曲如環

商山民引丹水灌園及作水磴

夜枕驚幽夢松汀照

病顏玉膏分地脈銀漢落人寰
漱石藏青鯉崩沙聚白鷗
村橋微雨後岸樹夕陽間
翠漲新萍綠紅浮敗葉殷
載車時濯足來伴釣魚閒

歲暮感懷貽馮同年中允

三首

謫宦商於郡閒門車馬稀
塵侵書命筆香散入朝衣
燒盡峯巒出霜晴木葉飛
夜來天欲雪寒夢不成歸
歲暮客商山謫居多晝眠
夢迴紅藥樹身落紫微天
不得親公事如何望俸錢
荒城共誰語除却訪同年

謫居京信斷歲暮更淒涼郡僻青山合官閒白日長燒
煙侵寺舍林雪照街坊為有遷鶯侶詩情不敢忘

畬田詞

有序

上雒郡南六百里屬邑有豐陽上津皆深山窮谷不通
轍迹其民刀耕火種大抵先斫山田雖懸崖絕嶺樹木
盡仆俟其乾且燥乃行火焉火尚熾即以種播之然後
釀黍稷烹雞豚先約曰某家某日有事于畬田雖數百
里如期而至鋤斧隨焉至則行酒啗炙鼓譟而作蓋斲

而掩其土也掩畢則生不復耘矣援桴者有勉勵督課之語若謠曲然且其俗更互力田人人自勉僕愛其有義作畬田詞五首以侑其氣亦欲採詩官聞之傳于執政者苟擇良二千石暨賢百里使化天下之民如斯民之義庶乎污萊盡闢矣其詞俚欲山人之易曉也

大家齊力斲孱顏耳聽田謠手莫閒各願種成千百索山田不知畝畝但以百尺繩量之曰某家今年種得若干索豆箕禾穗滿青山

殺盡雞豚喚斲畬由來遞互作生涯莫言火種無多利

樹種明年似亂麻

種穀之明年自然
生禾山民獲濟

數聲獵獵酒醺醺
斫上高山入亂雲
自種自收還自足
不知堯舜是吾君

北山種了種南山
相助刀耕豈有偏
願得人間皆似我
也應四海少荒田

畬田鼓笛樂熙熙
空有歌聲未有詞
從此商於為故事
滿山皆唱舍人詩

雪後登靈果寺閣

雪引詩情不敢慵來登高閣犯晨鐘山僧莫怪多時望
玉立南山萬萬峯

獨遊南靜川

雪高車嶺上無人南靜川中信馬行多謝仙娥相管顧
遠擎松雪助詩情

賀畢翰林

新入

聞步花輓喜復悲所悲若較十年遲銀臺曉入批丹詔
銅鏡秋開鑷白髭宮錦細袍宣與著內閑驕馬賜來騎

家門記得咸通事莫忘論兵夜召時

咸通中畢相在翰林時懿宗將復河

湟夜召論邊事數陳方略甚稱旨上曰吾方謀帥不意頗收在吾禁苑遂有登壇之命也

賀三舍人新入西掖

呂祐之

錢若水

王旦

紫微新命舊交遊報到商於寂寞州天上共分三字貴

山中金減戴車愁拋離紅藥心無恨彈拂金貂舞不休

最喜吾宗有餘慶鳳毛還直鳳池頭

第五廳王舍人故兵部閹老之子

送舍弟赴舉因寄兩制諸大僚

堂上尊親鶴髮垂十年祿仕不相離何期膝下承顏日

却是山中謫宦時未有重茵如子路空披綵服學嬰兒
全家送爾隨鄉薦試向朝端獻此詩

商山海棠

錦里名雖盛商山艷更繁別疑天與態不稱土生根淺
著紅蘭染深於絳雪噴待開先釀酒怕落預呼魂香裏
無勑敵花中是至尊桂須辭月窟桃合避仙源浮動冠
頻側霓裳袖忽翻望夫臨水石窺客出牆垣贈別難饒
柳忘憂肯讓萱輕輕飛燕舞脈脈息嬌言蔥陋虛侵逕

梨兒浪占園論心留蝶宿低面厭鶯喧不忝神仙品

好事

者作花品以此為神仙

何辜造化恩自期栽御苑誰使擲山村綺

季荒祠畔仙娥古洞門煙愁思舊夢雨泣怨新婚畫恐
明妃恨移同卓氏奔祇教三月見不得四時存繡被堆
籠勢燕脂浥淚痕戴車猶未去應得伴芳樽

翰林畢學士寄示醫癭藥方因題四韻兼簡兩制
諸知

預憂囊癭病龍鍾乞得仙方必有功縱得項如樗里子

也應頭似夏黃公西暉亭上峯巒碧

亭在州之西十里對羣峯每日落時

有如南靜川中木葉紅

川在州之南二三里平如掌居人百餘家秋來一川紅葉又有

小桃夾水而生春聞此景不惡矣

盡是貳車堪醉處春來難放酒樽空

內翰畢學士

子安

外制柴舍人

成務

故兵部閣老

王公

祐

之門生又與第五廳舍人

旦

同在兩制

追思餘慶因賦短章寄于三君子

掌貢司言耀聖朝宦途屯否數難逃雄文自貯胸中甲

直氣誰防笑裏刀黃閣不登名甚屈紫垣終老道彌高

君看身後榮多少兩制門生伴鳳毛

賀柴舍人新入西掖

成務

早折蟾宮第一枝綸闈恩命苦何遲久為俗吏殊無味

合掌王言亦有時好繼忠州文最盛應嫌長慶格猶卑

舍人嘗與予評前賢詔詰以為陸相首出

若奉天罪已詔元白之徒可坐在廊下

他年莫忘中

吳宰六里山前訝紫芝

早歲予為長洲宰舍人以殿院知蘇州

歲除日同年馮中允攜觴見訪因而沉醉病酒三

日醒而偶贈

除夜渾疑便白頭攜壺相勸醉方休敢辭枕上三朝卧
且免燈前一夕愁薄命我甘離鳳閣多才君亦滯龍樓
相逢不盡杯中物何以支當寂寞州

得昭文李學士書報以二絕

來書云看書除壯老
樂天詩最宜枕藉

謫居不敢詠江離日永門閒何所為多謝昭文李學士
勸教枕藉樂天詩

左宦寂寥推上洛窮愁依約似長沙樂天詩什雖堪讀
奈有春深深遷客家

南靜川野桃花下獨酌因簡馮中允

野桃無主滿山隈
遷客攜觴獨自來
盡日馨香留我醉
每春顏色為誰開
枝穿綠竹渾疑畫
片落丹河去不迴
待約同年一攀折
便如劉阮到天台

放言

誰信人間是與非
進須行道退忘機
卦逢大壯羝羊困
鄉入無何蛺蝶飛
澤畔衣裳蘭作佩
山中生計竹為扉
饑腸已共夷齊約
一曲高歌去採薇

寄獻僕射相公 二首

三朝文匠百僚師，再秉洪鈞七政齊。
一道白麻來玉署，

兩條紅燭上沙堤。

故事宰臣雙燭餘官一而已

池波尚浴當時鳳，省

樹猶存舊日雞。鑪冶正開無棄物，應憐折劍在塵泥。

聖君宵旰念生民，重命甘盤秉國鈞。
引馬但傳三刻漏，

近制午後三刻宰相出

喘牛休問四時春。羹和舊鼎黃金鉉，雪壓

新堤白玉塵。

相公再入後京師屢降時雨

應念前年獻詩客，謫官無

俸不勝貧。

相公前年罷時予獻詩二首其卒章云却恐優游未終歲，台星依舊照黃扉。

寄馮舍人起

轉輸爭合滯才華急詔重來上漢槎

舍人自西川轉運入閣下繼我

已吟紅藥樹勸君曾賦海棠花

前年舍人赴西川轉運予有詩送之云莫學當

初杜工部因循

不賦海棠詩

詞隨健筆光綸誥詩落成都燦綺霞應

笑同時東觀客商於憔悴似長沙

予與舍人早忝同年直史館

迴襄陽周奉禮同年因題紙尾

武關西畔路巉巖兩月勞君寄兩緘鏡裏想添新白髮

篋中猶貯舊青衫扶頭酒好無辭醉縮項魚多且放饒

譬似元和張太祝十年不改舊官銜

清明日獨酌

一郡官閒唯副使一年令節是清明
春來春去何時盡閒恨閒愁觸處生
紫鶯黃鸝誇舌健柳花榆莢鬪身輕
脫衣換得商山酒笑把離騷獨自傾

寒食

今年寒食在商山山裏風光亦可憐
稚子就花拈蛺蝶人家依樹繫鞦韆
郊原曉綠初經雨巷陌春陰乍禁煙

副使官閒莫惆悵酒資猶有撰碑錢

春日登樓

紅桃飛盡綠楊深獨倚危樓半日吟六里山川多逐客

近代朝士左
遷多在此郡

貳車官職是籠禽蓬沾殘雪經秋髻葵隔

浮雲向日心身世榮衰不能算且傾村酒沃愁襟

山僧雨中送牡丹

數枝香帶雨霏霏雨裏攜來叩竹扉擬戴却休成悵望

御園曾插滿頭歸

春居雜興

二首

兩枝桃杏夾籬斜
粧點商山副使家
何事春風容不得
和鶯吹折數枝花

春雲如獸復如禽
日照風吹淺又深
誰道無心便容與
亦同翻覆小人心

登郡南樓望山感而有作

西接藍田東武關
有唐名郡數商顏
二千石盡非吾道
一百年來負此山

自唐末至今百餘年無文臣為刺史

重疊曉嵐新雨後

參差春雪夕陽間
唯供仙客風騷興
醉望吟看不暫閒
讀史記列傳

西山薇蕨蜀山銅
可見夷齊與鄧通
佞倖聖賢俱餓死
若無史筆等頭空

睡

十二
韻

此境一何醇熙熙
別得春有聲皆俗格
無夢是天真
壁上登山屐床頭
漉酒巾輕輕龜喘
息冉冉蝶精神
滯寂通禪理無何等
道人曲肱高勝枕
藉草軟於茵
吟苦魂

初暝盃酣味更珍
覺知生是幻靜與死為鄰
酷恨巢簷燕生憎款戶賓
功成歸展轉先兆自嘖呻
不入榮名客還宜放逐臣
東憲一丈日且作自由身

送秦供奉自商州使鄂渚

供奉本江左人

攜家畫錦行山驛
接江城使是皇華貴人還
故國榮離筵青杏小別夜
子規鳴鸚鵡洲邊宿無忘
弔禰衡

聞進士孫何及第因寄

昨朝邸吏報商山
聞道孫生得狀元為賀聖
朝文物盛

喜於初入紫微垣

哭同年羅著作

名處約字思純作三首

宿草離披淚滿衫孤墳遙想帝城南

思純權厝東京黃風門下

天生

賈誼成何事祇得人間三十三

一枝丹桂謾成名一片緋衫未是榮賴有遺文在東觀

直應千載氣如生

著作沒後有文集十卷翰林蘇舍人表進詔付史館號東觀集

荒涼故宅何人住寂寞孀妻即日還一歲嬰兒安健否

巨源雖在謫深山

西暉亭

仙娥峯下大中年
刺史崔黯所造

孤亭疊嶂東，宛是古屏風。每到天將暮，渾疑日再中。餘

霞猶散綺，新月已張弓。一水漪漣媚，千巖木葉紅。

丹水在亭

前玳筵何烜赫，火宅忽牢籠。隙晃歸巢燕，簷拖截澗虹。

果迷丹摘熟，洞訝赤城通。

南有仙娥洞

似燒連松塢，如斑染

竹叢。近邀青瑣客，來伴紫芝翁。望久情無倦，吟多性未

窮。陽鳥看黯黯，歸馬恨匆匆。會待長棲隱，青冥逐去鴻。

謫居

親老復嬰孩吾生自可哀無由得歸去有俸自嗟來直
道雖已矣壯心猶在哉端居寡儔侶懷抱向誰開

道服

楮冠布褐皂紗巾曾忝西垣寓直人此際暫披因假日
如今長著見間身濯纓未識三湘水漉酒空經六里春
不為行香著朝服貳車誰信舊詞臣

寄題洛南秦供奉新樓

多羨新樓上公餘寓望閒數峯迷華岳一面是商山暮

暗幽雲過簷喧宿鳥還萬重蒼翠裏百尺沈寥間嵐破
分樵逕沙明認釣灣望秦晴矗矗清洛夜潺潺平遠長
安道微茫函谷關吟哦生古意圖畫寄朝班何日隨高
步乘秋豁病顏銷憂吾祖事會待共躋攀

望秦
嶺名

獨酌自吟拙詩次吏報轉運使到郡戲而有作

日高睡足更何為數首新篇酒一卮郡吏謾勞相告報
轉輸應不管吟詩


春遊南靜川

南過高車嶺

一云膏車嶺
膏音告

川源似掌平
峯巒開畫嶂
眈眈

列棊枰
帝女柔桑綠
王孫野草生
提壺催我醉
戴勝勸人耕
商嶺堪攜妓
丹河好濯纓
蓋圓松影密
鞭亂竹根
犇勃勃
畬田氣磷磷
水磴聲野桃
誰是主
山鳥不知名
欲舞寧無蝶
思哥亦有鶯
官閒春日永
擔酒此中行



小畜集卷八

欽定四庫全書

集部

小畜集卷十九

詳校官監察御史臣李陽樞

檢討臣何思鈞覆勘

總校官進士臣朱鈐

校對官中書臣田尹衡

謄錄監生臣陳煜

欽定四庫全書

小畜集卷九

宋 王禹偁 撰

律詩

南郊太禮詩十首

太師中書令魏國公冊贈尚書令追封真定王

趙公普挽詩十首

和仲咸詩六首

和與喻豐陽夜話

和迴喻令詩集

和自詠

和與盧氏宋少府話舊遊

和題鳴馬廟

和送道服與喻宰

奉寄海州副使田舍人

恭聞种山人表謝急徵不赴榮侍因成拙句仰

紀高風

再賦二章一以頌高人之風一以伸俗吏之意

五更睡

自詠

遣興

夏雲

丹河閒步

新秋即事

三首

秋居幽興

三首

前賦春居雜興詩二首間半歲不復省視因長
男嘉祐讀杜工部集見語意頗有相類者咨
于予且意予竊之也予喜而作詩聊以自賀

翟使君挽歌

三首

村行

淳化二年八月晦日夜夢於上前賦詩既寤唯
省一句云九日山州見菊花間一日有商於
貳車之命實以十月三日到郡重陽已過殘

菊尚多意夢已徵矣今忽然一歲又逼登高
追續前詩句因成四韻

仲咸就加郡印因以四韻賀而勉之

自嘲

雪霽霜晴獨尋山逕菊花猶盛感而賦詩

寄豐陽喻長官

官舍竹

雪夜看竹

喜雪貽仲咸

賦得臘雪連春雪

立春日細雨

霽後望山中春雪

閒居

有懷戚二仲言同年

春郊寓目

杏花

七首

寄陝府通判孫狀元何兼寄令弟秀才僅

日長簡仲咸

春郊獨步

種菜子雨下

偶置小園田題二首

戲從豐陽喻長官覓筍

三月二十七日偶作簡仲咸

送巡撫侍讀呂司諫

別商山

已下量移
解梁作

別丹水

別四皓廟

別仙娥峯

別北窻竹

別堂後海棠

量移後自嘲

量移自解

留別仲咸 二首

出商州有感

閩鄉縣留題陶氏林亭

寄潘處士

將及陝郊先寄孫狀元

甘棠即事簡孫何

解梁官舍

中條山

五老峯

書孫僅甘棠集後

櫻桃

贈朗上人

南郊大禮詩

十首

聖君重卜祀南郊仗擁黃麾間白旄仙吹冷翻蒼玉佩
曉霞晴透絳紗袍天開堯率齋宮靜海湧蓬萊帳殿高
遷客生還知有望商山不敢讀離騷

百僚冠劍互珊珊文物歲蕤屬禮官清漏宿齋宣祖廟
質明行事昊天壇旌旗漠漠帷宮曉星斗依依綵仗寒
腸斷商於左遷客園丘無分得榮觀

嚴配郊丘展孝思質文叅酌禮無違太羹味薄牲牲潔
至樂聲和鳳鳥飛黃道月斜風細細紫壇天曉露霏霏
可憐此夜商山客畫盡爐灰淚滿衣

綵城殘月帶微霜版奏中嚴夜未央三獻欲終侵曙色
百神齊下散天香珠旒微亂墜簾韻紫燎輕籠劍珮光

卷九
此夕商山對何物猿啼鳥哭樹蒼蒼

嚴裡禮退一陽生
抃賀懽呼動四溟
聖壽久長南至日
寶圖高大北辰星
九重城闕天將曙
百萬人家戶不扃
知有化功無棄物
海波分納一浮萍

乾元門上赭袍光
雉扇初開散御香
郊祀一十年運祚
赦書三萬里封疆
人間草木霑皇澤
天上咸韶送壽觴
惆悵昔年曾侍從
而今翻似鼠拖腸

六街旌旆繡虹蜺
仙仗參差羽衛齊
千步廊前班振鷺

百尋竿上揭金雞，狴牢冷落停丹筆。郡國懽呼折紫泥，
鳳閣舊臣期赦宥，免教長似觸藩羝。

千官雲擁御樓時，朝服紛紛換禮衣。萬里梯航歸大國，
一聲雷雨破圜扉。青蠅傳去人人喜，丹鳳啣來處處飛。
收盡洛南遷客淚，全家潛望日邊歸。

綵雲隨步下乾元，雨露新恩洽普天。四輔首迎丹鳳詔，
六師齊散廩犧錢。熙熙品物瞻堯日，習習薰風動舜絃。
商洛貳車當此際，舊朝衣上淚潺湲。

年來不見祀園丘
謫宦攜親嘆白頭
作賦有時悲鵬鳥
殺身無路學犧牛
非才豈合居臺閣
歸夢徒勞近冕旒
千載遭逢如未替
此時重見帝王州

太師中書令魏國公冊贈尚書令追封真定王趙

公普挽詩

十首

玄象中台折皇家上相
薨大功銘玉鉉密事在金縢
無復同魚水空嗟失股肱
若言豐沛舊陪葬近長陵

經緯千年業陶鎔萬物功
藩垣龍節在禁掖鳳池空
鹵

簿蒙寒雨銘旌颺曉風太常草儀注全似葬周公

重位經三人高年過七旬有言皆為國無日不憂民溫
樹蕭蕭影甘棠漠漠春遙知神德廟配饗更何人

國喪三台首家藏五廟尊紀功誰秉筆冊贈帝臨軒盛
德留千古真魂閉九原皇情彌軫悼天柱折崑崙

麟喪虛靈囿鳳衰空帝梧陶鎔存庶彙霖雨潤寰區舊
疏同伊訓遺章入禹謨九原何所恨猶未減匈奴

空留遺像在凌煙誰繼堂堂命世賢將相位高三十載

風雲道合一千年霖收傳說巖前雨石隕媧皇補後天
見說吾君舉哀處重瞳揮灑淚潺湲

君恩雖聽罷居留官拜維師命更優異物忽隨黃石葬
晚年終負赤松遊憑誰借箸論歸馬無復停車問喘牛
唯有功名書信史肯同塵土一時休

曾拜四章辭相府又陳三表罷留司朝廷年德劉仁軌
終始功名郭子儀印鏤黃金塵黯澹堂間綠野草離披
吾君若念先朝舊應似文貞御製碑

忽聽雙雙定鼓聲
笳簫鳴咽暮雲凝
勲勞自合同蕭相
謚法還須比魏徵
曉月暗垂丹旆露
夜風輕觸總帷燈
三川父老知何限
盡逐靈輜淚滿膺

元老令終歸葬日
有司重奏輟朝時
駢羅鹵簿三公禮
告訃同盟五月期
何處更求廊廟器
是誰重作帝王師
商山副使偏垂淚
未報當年國士知

和仲咸詩

六首并
用本韻

和與喻豐陽夜話

仲咸與喻令
同江左人

澤國來朝積歲年
商山相遇話鄉原
郊詵重折月中桂
仲咸江南已及第
八朝自陶令未歸
江上村嵐氣滴空
左馮尹掾錄廳人及第
無限翠泉聲
通夕有何冤
寒燈挑盡芳罇竭
所得新奇
盡雅言

和迴喻令詩集

喻令名蟾
鬼之裔孫

風雅荒涼信可悲
家聲留得盡玄微
且欣丹穴一毛在
莫道沅江九肋稀
思苦也知闕國政
官卑應為洩天機
他時遷客歸朝去
擬覓瓊瑤滿袖歸

和自詠

玉經炎火竹經霜却把剛腸變酒腸庾信悲哀休作賦

接輿歌曲且佯狂更諳喪亂災為福

仲咸幼經江左離亂

蘊蓄才

華有若亡孤宦由來宜晚達祝君霄漢路岐長

和與盧氏宋少府話舊遊

舊遊前政一追尋

仲咸十年前
任盧氏尉

官路遷移敵古今黃綬

位卑曾歎命青宮官冷不妨吟

仲咸官久淹
今為中允

煙嵐不改

當憲色桃李應垂滿砌陰好寄新詩題舊壁為言梅福

珥朝簪

和題鳴馬廟

廟在豐陽古老傳云昔有人冠蓋乘馬隱于此山鄉人祠而祀之至

今時聞馬鳴其靈異具仲咸詩序

何人祠廟立空山
四皓精靈合往還
匹馬不辭峯更險
冥鴻應為世多艱
雲生碧殿紫鷗尾
風觸金鋪動獸環
欲識姓名無問處
空聞靈異庇商顏

和送道服與喻宰

朝客吟詩送羽衣
應知彭澤久思歸
三年官滿誰留得

領鶴攜琴賦式微

寄海州副使田舍人

繫即匏瓜轉即蓬可憐蹤跡與君同眼前有酒長須醉
身外除詩盡是空閒採紫芝饑可療欲浮滄海道應窮
聲名官職相磨折休憶西垣藥樹紅

恭聞种山人表謝急徵不赴榮侍因成拙句仰紀
高風

未赴吾君鳳詔徵蒲輪何似板輿榮自期物外長無事

誰覺人間已有名
餌木肯嘗鍾鼎味
紉蘭應笑珮環聲
洛南遷客堪羞死
猶望量移近帝城

再賦二章一以頌高人之風一以伸俗吏之意

表讓皇家買酒錢

上令京兆府賜山人酒錢讓而不受

醉鄉歸去更陶然

吾君若問徵君意
自有東臯種秫田

不應明時鵠板書
可能終老傲唐虞
神仙見說須陰德
肯為蒼生一出無

五更睡

數載直承明寵深還若驚起朝雞喚起殘夢馬馱行左
官離雙闕高眠盡五更如將閒比貴此味敵公卿

自詠

華髮不稱老高堂為有親寧同賈生恨自比老萊身官
散且無過俸微猶助貧誰能學屈蠓拳跼苦求伸

遣興

百年身世片時間况是多愁鬢早斑貧有琴書聊自樂
貴無功業未如閒波平南浦堪垂釣日滿東窗尚掩關

祇為慈親憶歸去
商山不隱隱何山

夏雲

嵯峨高鏤夕陽紅
斜入吟窻秀色濃
六里青山長滿眼
不勞雲片學奇峰

丹河閒步

誰愛潺湲到水濱
春來唯有我來頻
沙邊坐慣漁翁識
岸上行多白鳥馴
髭髮照看添霰雪
冠纓濯後少埃塵
今秋更擬營菴笠
冒雨衝風把釣綸

新秋即事

三首

露莎煙竹冷淒淒
秋況無端入客衣
鑑裏鬢毛衰颯盡
日邊京國信音稀
風蟬歷歷和枝響
雨驚差差掠地飛
繫滯不如商嶺葉
解隨流水向東歸

宦途流落似長沙
賴有詩情遣歲華
吟弄淺波臨釣渚
醉披殘照入僧家
石挨苦竹旁抽筍
雨打戎葵卧放花
安得君恩許歸去
東陵閒種一園瓜

百歲浮生一夢中
夢中何事有窮通
姓名舊署黃麻紙

顏狀今成白髮翁
煙暝曉窻螢火碧
雨昏幽徑蓼花紅
謫居始信為儒苦
生計兼無一畝宮

秋居幽興

三首

秋光雖寂澹
幽興入詩家
籬暗螢啼菊
園荒蟻上茄
團碁知日影
理髮見霜華
向曉兒童喜
溪僧遺晚瓜

園林經積雨
晚步思悠哉
宿鳥頭相並
秋瓜項自開
藥田荒野蔓
屐齒沒蒼苔
幽興將何遣
攜琴貴酒杯

謫居人事慵
幽興與誰同
僧到烹秋菊
兒啼索草蟲
掃

苔留嫩綠寫葉惜殘紅歲晏琴樽好籬邊有菊叢

前賦春居雜興詩二首間半歲不復省視因長男

嘉祐讀杜工部集見語意頗有相類者咨予
且意予竊之也予喜而作詩聊以自賀

命屈由來道日新詩家權柄敵陶鈞任無功業調金鼎

且有篇章到古人本與樂天為後進

予自謫居多
看白公詩敢期

予美是前身從今莫厭閒官職主管風騷勝要津

翟使君挽歌

三首

丹旆換紅旌蕭蕭五馬鳴今朝為旅櫬昨日是專城愛

予方之蜀

時使君之子
奉使入蜀

遺書未到京貳車郊外送揮淚

滿塵纓

國史書勲伐州民頌樂康豈難存栢槨亦合葬桐鄉黃
壤千年恨青山六里長空餘鈴閣畔寂寞菊花香

未滿三年政何妨五月期理言歸葬速遺愛出山遲牆

翬穿雲過銘旌著雨垂洛陽多故吏號泣住靈輜

使君
早年

知河

南府

村行

馬穿山逕菊初黃
信馬悠悠野興長
萬壑有聲含晚籟
數峯無語立斜陽
棠梨葉落燕脂色
蕎麥花開白雪香
何事吟餘思惆悵
村橋原樹似吾鄉

淳化二年八月晦日夜夢於上前賦詩既寤唯省
一句云九日山州見菊花間一日有商於貳車
之命實以十月三日到郡重陽已過殘菊尚多
意夢已徵矣今忽然一歲又逼登高追續前詩

句因成四韻

節近登高忽嘆嗟經年憔悴別京華
貳車何處搔蓬鬢九日山州見菊花
夢裏紫衰安足道眼前盃酒且須賒
商於鄒魯雖迢遞大抵攜家即是家

仲咸就加郡印因以四韻賀而勉之

如何小郡滯清賢未得徵歸振鷺班
莫怕三年持漢詔猶勝遷客卧商山
俱諳宦路須推命同有詩情合好閒
唯是謫官無考限比君知向幾時還

自嘲

三月降霜花木死

今年三月
商州有霜

九秋飛雪麥禾灾蟲蝗水

旱霖靈雨盡逐商山副使來

今秋洛南縣蝗又
大水夏旱秋雨雪

雪霽霜晴獨尋山逕菊花猶盛感而賦詩

狼藉金錢撒野塘幾叢無力卧斜陽爭偷暖律輸桃李

獨亞寒枝負雪霜誰惜晚芳同我折自憐孤艷襲人香

幽懷遠慕陶彭澤且擷殘英泛一觴

是歲商州九月十
八日大雪後霜晴

寄豐陽喻長官

七十年華髻未霜道情偏稱牽豐陽早衙請印無仇覽

豐陽戶不滿
千例省主簿

夜榻圍碁祇孟光

喻牽好碁又
與內子敲手

庭戶萬重

嵐氣潤盤餐數釘藥苗香猶言彭澤終歸去門柳青青
檻菊黃

官舍竹

誰種蕭蕭數百竿伴吟偏稱作閒官不隨天艷爭春色
獨守孤貞待歲寒聲拂琴牀生雅趣影侵碁局助清懽
明年縱便量移去猶得今冬雪裏看

雪夜看竹

夢斷閒窗酒半醺
月華薄薄雪紛紛
莫言官散無拘束
一夜披衣見此君

喜雪貽仲咸

半冬無雪懶吟詩
薄暮紛紛喜可知
衣上惹來看不足
竹邊聽處立多時光
迷曙色侵窗早片舞
寒空到地遲
今日使君吟望好
一車飛絮醉褰帷

賦得臘雪連春雪

商州數
年無雪

臘雪連春雪商民舞且歌數年求不得一尺未為多試
法烹茶鼎資吟落釣蓑登樓應更好丹水是銀河

立春日細雨

澹於寒霧亂於絲無點無聲落不知輕助雪痕歸麥壠
暗隨春氣入梅枝踏苔立久微霑屐遶竹吟餘漸著髭
翻憶滿身珠漉漉江頭閒把釣蓑披

霽後望山中春雪

誰種離離碎玉苗曉樓吟望興偏饒白雲作伴宜長在

紅日無情已半銷
聚映早霞明野寺
散隨春水過溪橋
世間安得王摩詰
醉展霜縑把筆描

閒居

何必問生涯
幽閒度歲華
有琴方是樂
何竹不成家
吟裏銷春色
眠中見曙霞
今年如未去
更擬種胡麻

有懷戚二仲言同年

聞說去官常悽悽
返故鄉與君同甲子
似我有文章憔悴
衣衫綠蹉跎鬢髮蒼
此身知幸處
曾得紫微郎

春郊寓目

百舌嬌慵未苦啼，雪隨春水下松溪。
何人樵樹和雲斫，幾處山田帶雨犁。
蜀柳半開鸚鵡眼，海棠深結麝香臍。
東風似待閒人出，一路青莎襯馬蹄。

杏花
七首

紅芳紫萼怯春寒，蓓蕾粘枝密作團。
記得觀燈鳳樓上，百條銀燭淚闌干。

暖映垂楊曲檻邊，一堆紅雪罩輕煙。
春來自得風流伴，

榆莢休拋買笑錢

桃紅梨白莫爭春
素態妖姿兩未勻
日暮牆頭試回首
不施朱粉是東鄰

長愁風雨暗離披
醉遠吟看得幾時
唯有流鶯偏稱意
夜來偷宿最繁枝

登龍曾入少年場
錫宴瓊林醉御觴
爭戴滿頭紅爛漫
至今猶雜桂枝香

長安廢棄遷都後
曲沼荒涼一夢中
見說舊園為茂草

寂寥無復萬株紅

陌上繽紛枝上稀多情猶解撲人衣
雙成灑道迎王母
十里濛濛絳雪飛

寄陝府通判孫狀元

何兼簡令弟秀才 僅

商山留滯再經年咫尺無由見狀元
會赦未教歸北闕
高歌應合遇東園
寸心漫道如弦直
兩鬢難禁似雪繁
兄弟相知情未改
著書呼取屈原魂

日長簡仲咸

日長何計到黃昏
郡僻官閒晝掩門
子美集開詩世界
伯陽書見道根源
風飄北院花千片
月上東樓酒一罇
不是同年來主郡
此心牢落共誰論

春郊獨步

襟袖飄飄晚吹輕
孤吟何必共人行
綠楊繫馬尋芳逕
春草隨人上古城
不憤黃鸝誇巧舌
多慙戴勝勸歸耕
凭高朗詠沉湘賦
自許吾生似賈生

種菜子雨下

菜助三餐急園愁五月枯廢畦添糞壤胼手摔荒無前
日種子下今朝雨點麤吟詩深自慰天似憫窮途

偶置小園田題二首

十畝春畦兩眼泉置來應得弄潺湲三年謫官供廚菜

此園典
三年

數月朝行賃寶錢

其價直
如此

空媿先師輕學圃未

如平子便歸田此身久畜耕山計不敢拋官為左遷

偶營菜圃為盤飧淮瀆祠前水北村泉響靜連衙鼓響
柴門深近子城門濛濛細雨春蔬甲疊疊寒流老樹根

從此商於地圖上畫工添箇舍人園

戲從豐陽喻長官覓筍

春來春筍滿豐陽祇把盤飧勸孟光

長官祇有妻無子

犀角錦

丈雖可惜也須分惠紫微郎

三月二十七日偶作簡仲咸

一未量移一轉勳

時赦後予未量移仲咸祇加騎都尉

貂冠羊胃總非真

予檢校常侍故云貂冠仲咸騎都尉故云羊胃

韶光祇有三兩日浮世稀逢七

十人青杏勸君重酌酒牡丹邀我且尋春

仲咸半月來病肺不飲因

觀青杏又復淺酌
牡丹旦暮開矣

請看富貴趙中令已作北邙山下塵

送巡撫侍讀呂司諫

三十軍城百萬家侍臣分命走輶車
長春殿裏承丹詔
乙夜書邊別翠華
駐馬祇教看墮麥
憂民無暇醉溪花
歸朝舊友如相問
為道山中學種畬

別商山

已下量移
解梁作

欲辭蒼翠入塵囂
把酒看山思寂寥
莫動移文苦相責
解梁聞說近中條

別丹水

曾經爛漫濯吾纓
忍別潺湲月夜聲
便入紅塵染詩思
吟魂猶合數年清

別四皓廟

明朝欲別採芝翁
吟遶堦前苦竹叢
貶謫入山非美退
此中爭敢逐冥鴻

別仙娥峯

商山留滯再經春
吟愛仙娥最出羣
若有精靈念遷客

暫來河北作行雲

別北窻竹

滿窻踈韻伴吟聲
別夜猶憐枕簟清
見說解梁難種植
此君相別若為情

別堂後海棠

一堆紅雪媚青春
惜別須教淚滿巾
好在明年莫憔悴

校書直是愛花人

此堂予去後是推官王校書移入

量移後自嘲

可憐蹤跡轉如蓬
隨例量移近陝東
便似人家養鸚鵡
舊籠騰倒入新籠

量移自解

商山五百五十日
若比昔賢非滯留
試看江陵元相國

四年移得向通州

元稹自江陵士曹
四年移通州司馬

留別仲咸 二首

二年商嶺賴知音
惜別難藏淚滿襟
頭白忽拋攀桂伴
道消休話拔茅心
科名偶得同年分
交契都因謫宦深

唱和詩章收拾起兩家留與子孫吟

世網嬰纏不自由可憐匏繫又萍流忽從清洛南邊郡
移向黃河北岸州命薄我甘閒副使道孤君是假諸侯
解梁去此無多地時寄新詩慰客愁

出商州有感

園丘恩例得量移笑領全家出翠微唯有來時的盧馬
商山埋骨不同歸

閬鄉縣留題陶氏林亭

年來恩例得量移祇合高歌不合悲消長盈虛存大易
東西南北有先師未拋軒冕終妨道偶見林泉且賦詩
何事闌鄉住三月吟情難捨竹邊池

寄潘處士

賣藥先生白布衣書來方信在京師減君爐裏燒丹術
助我山中買酒貲

處士自京寄
白金相贈

聞似野雲終不仕閑如

籠鶴已多時飄飄又去黃河北更負中條幾首詩

將及陝郊先寄孫狀元

宦途漂蕩似浮萍又到棠陰召伯城親老轉添衰鬢白
妻兒猶免智囊生狀元館穀如無倦副使量移豈繫程
吾道不拘官冷暖唯君應合出郊迎

甘棠即事簡孫何

玉堂風雅美賢臣伐樹悽悽秉聖人因感得時留蔽芾
更嗟無位泣麒麟誰知素教長多難我向清朝自不辰
聽訟何如使無訟與君憂道合霑巾

解梁官舍

郡在中條山脚下監南風起晝昏昏舍人謫宦雖言命
副使量移豈是恩月有俸錢堆長物日無公事掩閑門
上天於我心還厚祇遣文章道更尊

中條山

二十韻
并有序

薛許昌賦中條山十四韻且自云兩京之間巨題不媿
不負至今百年人亦無敢繼者禹偁量移解梁日與山
接苟默而無述後之覽吾集者謂宋無人因賦二十韻
而起河盡海之意不能不相涉也蓋狀山之形張詩之

氣使然爾又五老峯者茲山之特秀避而不言猶人無
眉目矣過是皆許昌之所未道者以此易彼庶幾並行
崛起巨河邊犇騰欲上天遠臨滄海盡高與太行連大
塊橫為脊它山立似拳土膏經舜耒石險任秦鞭洞黑
狂吹雨峯青冷罩煙店荒壇道絕寺古栢梯懸崦漏微
茫雪巖垂淅瀝泉迸根通砥柱斜逕入閒田北笑恒藏
寶西輕華聳蓮三門遙託跡五老迴差肩落葉樵夫拾
靈苗本草傳柱空擎雁塔倒影蓋魚船繪畫終無手封

崇必有年鹽池浮翠靄黃澤媚漪漣陰壑乖龍蟄枯杉
凍虺穿圖經標數郡神異產羣賢呼壽嵩何諂升中岱
豈專斯文如已矣此地可終焉暫看猶銷病頻登合得
仙許昌休自負吾什亦銘鐫

五老峯

十六
韻

矗矗拂星榆崢嶸與衆殊精靈聳昂宿神異載河圖捧
日光先及叅天禮不趨綠蘿供組綬清籟獻笙竽淺雨
遙霑華堆嵐下照蒲僧憲分未足郡閣占應俱漠漠雲

交袂霏霏雪映鬚巨靈羞用壯玉女願為奴

玉女巖石在中條

落工難盡參差德不孤兒孫溪石小几杖澗松枯洞鄙
三茅隱山嫌四皓逋分形皆自立倒影要誰扶將數慙
同漢臣名合贊虞嵩峰真樹黨天柱太無徒安得隨人
意移將近帝都吾君南面處萬歲一齊呼

書孫僅甘棠集後

新集甘棠盡雅言獨疑陳杜指根源一飛事往名雖屈
六義功成道更尊骨氣向人蹲獬豸波濤無敵瀉崑崙

明年再就堯堦試應被人呼小狀元

櫻桃

十六
韻

鳳實綴嶙峋蟠根出俗塵子多將盡夏花晚不爭春上
苑空枝後荒巖滿樹新鳥含紅映背猿飽清流脣溪寺
初供佛山齋已待賓升筵叅李奈入市附樵薪葉襯青
舒榭籠擎綠透筠瀉盤能宛轉就酒益甘辛致養侔懷
橘投誠等獻芹齒酸雖欲罷喉渴尚宜頻漑水應無王
驅禽免廢人栽培傷物性髡接失天真自笑羹梅忝誰

知社稷神用堪登俎豆生合委荆榛差小同謙退饒先
似屈伸叔孫如薦廟朴野味彌純

贈朗上人

朗公少游渚宮
與齊已相識

淨剃霜鬕展舊真自疑容貌是前身僧中獨守三千戒
詩裏閒銷七十春僻寺蘚深人到少故山雲好夢歸頻
禪齋近日誰還往祇有西垣放逐臣

小畜集卷九